

CLIFFORD BROWN

"MIGHTY CLIFFY"

Clifford Brown alias "Mighty Clifffy" tabata un di e cantantenan cu a yega di participá na e festival di Calypso y Roadmarch.

Mighty Clifffy a cumenzá participá den e festival di Calypso y Roadmarch na aña 1982, cual tambe tabata e aña cu el a wordo eligí como Roadmarch King cu su cancion JAMMING.

Mighty Clifffy a bolbe participá den e festival di Calypso y Roadmarch y na e ocasion aki tambe el a hiba e titulo di Roadmarch King cu su cancion ROAD ON FIRE.


Despues di a logra e título aki, Mighty Clifffy a tuma e desicion di bai biba den exterior.

Despues di 14 aña Mighty Clifffy a regresá Aruba y a bolbe participá den e contest di Calypso y Roadmarch, pero debí cu e integrantenan di su banda no a logra bini Aruba e aña aki, el no por a haci esaki.

Mighty Clifffy ta considerá su participacion den e contest di Calypso y Roadmarch como un participacion na un otro fiesta.

"Pa mi nunca e tabata manera un competencia. Semper mi tabata bai mas pa participá cu pa gana. Nos tabata participá, pero no cu nunca nos tabata echt preocupá si nos gana of no, esta si nos gana ta bon, pero si nos no gana tambe nos ta aceptá esaki y prepará pa participá e siguiente aña."

Comparando e contestnan di añanan anterior y awor regresando



despues di 14 aña, Mighty Clifffy a bisa nos cu e ta mira cu e contestnan aki a bai hopi dilanti.

"Mi tabata hopi orguyoso di mira tur e participantenan, specialmente e muchanan jong; con nan a drenta aden y con nan ta cambia e música y hacié na un manera mas moderno. Pero e participacion si mi a goza ya cu tabatin bastante mucha muher cu a participá. Mi ta haña esaki masha bon mes," Mighty Clifffy a bisa.

Como mensahe pa e

público carnavalesco, Mighty Clifffy a bisa cu carnaval ta aki pa keda.

"Nos tur mester cooperá pa conserv'é. Carnaval ta un cos cu bo mester goza. Pues, sigui disfrutá di carnaval y purba hacié na un manera safe, pa mañan nos tur por tey atrobe pa sigui disfrutá di nos carnaval."

Finalmente Mighty Clifffy a bisa nos cu por lo pronto e lo keda biba na Aruba y cu sigur sigur nos lo wak e atrobe den e próximo festival di Calypso y Roadmarch.